

Namminersorlutik Oqartussat kommunillu Danmarkimi nunanilu allani kiffartuussinernut atavillugu aningaasartuutigisartagaasa Naalakkersuisut UKA17-imut misissuinermik saqqummius-sinissamik suliniuteqaqqullugit Inatsisartut aalajangiiffigisassaattut siunnersuut. Misissuiner-mi aamma innersuussutit qanoq ililluni nunatsinni kiffartuussinerit atorluarneqarnerusinnaaner-at, taamaalilluni nunatta avataaniit kiffartuussinerit annikillisarnissaat anguneqaqqullugu.

(Inatsisartunut Ilaasortaq Anthon Frederiksen, Partii Naleraq)

Akissuteqaat

(Aningaasaqarnermut Aatsitassaqaqarnermullu Naalakkersuisoq)

1. Siullermeerneqarnera

Naalakkersuisut aalajangiiffigisassatut siunnersuut qujassutigaa.

Pisiortortarneq pillugu kaajallaasitaq 24. september 2010-meersoq maanna atuuttoq nutarterlugu aal-lartinneqareerpoq. Tassa ammasumik suliaqartarnissap unammilleqatigiissinnaanerullu qulakkeerne-qarnissaat anguniarlugu Namminersorlutik Oqartussat pilersuisunut pisussaaffiik aaqqiissuteqartus-samik pisiortortarnermut kaajallaasitap nutarterneqarnerata saniatigut neqeroortitsisarnermut kaajallaa-sitaq nutaaq saqqummiunneqarpoq. Kaajallaasitap pineqartut Namminersorlutik Oqartussani naalak-kersuisoqarfinnut, Nunanut allanut Pisortaqarfimmut Nunatsinnilu Nakorsaaneqarfimmut kiisalu sulif-feqarfinnut namminersortitanut aappasaanik tusarniaassutigineqaqqammerput. Tusarniaanerup kingu-sinnerpaamik akissuteqarfineqarnissaanut ulloq 26. april killissarititaaavoq, tamatumalu kingunitsian-nguatigut kaajallaasitap naammassillugit suliarineqarnissaat saqqummiunneqarnissaallu naatsorsuutigi-neqarpoq.

Pisiortortarneq pillugu kaajallaasitassamut nutaamut missingiummi piumasaaqatigineqarpoq pisiortor-tarnermut tunngatillugu susassaqaqarfinni tamani aaqqiissuussaasumik ataqatigiissaarisooqartarnissaanut malittarisassaqaqarnissaq. Tassunga atavillugu suliaqarfiiit iliuuseqarfineqartariaqartut nassaarineqarnis-saat siunertarlugu Namminersorlutik Oqartussat pisiortortarnerat tamarmiusoq nalilersorneqassaaq. Taamaamat siunnersuutigineqartoq assigalugu Namminersorlutik Oqartussat kiffartuussinernut atavillugu aningaasartuuteqartarnerat, tassunga ilanngullugu Danmarkimi nunanilu allani, misissoqqis-sarneqassaaq.

”Nunatsinni tunisassianik pisisarnissamut” inassuteqaatinut - tunngatillugu oqaatigineqarpoq Kalaallit Nunaanni suliffeqarfiit isornartoqanngitsumik pisiniarfigineqartarnerat inuiaqatigiinnut iluaqutaalluin-nartumik pinngitsoorani sunniuteqarnavianngitsoq.

Unammilleqatigiinneq eqqarsaatigalugu tamatuma nassatarisinnaavaa pilersuisut ikilinerat akigitallu qaffannerat. Tamannattaq EU-mik suleqateqarnissamik isumaqatigiissutitsinnut naapertuutinngilaq, tassa nioqqutissanik kiffartuussinernillu pisiaqartarneq isumaqatigiissummi qitiusunut ilaammat.

Aamma nunarsuaq tamakkerlugu unammilleqatigiilluarnerup iluani nunatsinni inuussutissarsiteqar-nerup ineriartortinneqarnissaa pisariaqarpoq, tassani naammassisaqarsinnaaneq, aningaasartuutini-k annikillisaasinnaaneq nutaalorsinnaanerlu pingaarutilimmik inissisimatillugit.

Aningaasaqarnermut Sulisoqarnermullu Aqutsisoqarfik Namminersorlutik Oqartussat pisiortortarnerannut pingaarnertut tunngaviusunut akisussaasuvoq. Aqutsisoqarfimmi siunnerfeqartumik suliarineqartarput neqeroortitsinermi pisiortornermilu ingerlatseriaatsinik aaqqissuussinerit, tassa kalaallit suliffeqarfiutaat unammilleqatigiinnermi peqataasinnaanerat periarfissillugu.

Kiffartuunneqarnissamut neqeroortit kalaallit suliffeqarfiutaasa tamakkiisumik suliariuminaatsippasuk toqqartuinermik tunniussisarnissamulluunniit piumasaqaatit imaluunniit najukkami pilersuisut, suleqatigisartakkat, najukkami najugaqarnissaq, piginnaasanik qaffassaaneq assigisaaluunniit pillugit isumaqatigiissuteqarnissamik piumasaqaatit aqutugalugit peqataasarneq siuarsarneqarsinnaavoq.

Taamaalilluni kalaallit inuiaqatigiit inuussutissarsiuteqarnerullu ineriartortinneqarneri pisiassanut aalajangersimasunut immikkut ittumik piumasaqaateqarnikkut iluaquserneqarsinnaapput.

Taamaammat neqeroortitsisarnermut pisiortortarnermullu kaajallaasitassat nalilersorneqarnissaat naapertuuttuusoq Naalakkersuisut isumaqarput.

Tamanna tunngavigalugu Naalakkersuisut matumuuna imaattumik **allannguutissatut siunnersuorput:**

Neqeroortitsisarnermut pisiortortarnermullu kaajallaasitat nutaat nalilersorneqarnissaannik Naalakkersuisut peqquneqarnissaat pillugu Inatsisartut aalajangiiffigisassaattut siunnersuut, tassa taamatut nalilersuinissamut naammaginartumik misilittagaqalertoqarpat. Naliliineq tigussaasumik inassuteqaatitalik Inatsisartunut agguanneqassaaq.